

大珠禅师语录选辑

师越之建州人，依越州大云寺道智和尚受具足戒，法号慧海。初至江西参马祖，祖问来此何事？曰：求佛法。祖曰：自家宝藏不顾，抛家散走作什么？师遂礼拜问：那个是慧海自家宝藏？祖曰：即今问我者是，一切具足，何假外求。师言下大悟，识自本心，不由知觉，遂礼谢师，师事六载。

禅宗本来是教外别传，不立文字；甚至有『念佛一声，漱口三日』之传说。而此禅师于诸答问，虽演机锋，但以经律论为依据，且以深入显出开示；且所示者，均为佛教徒应有之共识，故选辑以供读者。

（一）金刚经是谁说

有法师数人来谒曰：拟伸一问，师还对否？师曰：深潭月形，任意揣摩。问：如何是佛？师曰：清潭对面，非佛而谁。众皆茫然，良久，其僧又问：师说何法度人？师曰：贫道未曾有一法度人。曰：禅师家法如此。师却问曰：大德说何法度人？曰：讲金刚般若经。师曰：讲几座来？曰：二十余座。师曰：此经是阿谁说？僧抗声曰：禅师相弄，岂不知是佛说耶？师曰：若言如来有所说法，则是谤佛，是人不解我所说义。若言此经不是佛说，则是谤经，请大德说看。僧无对，师少顷又问：经云：若以色见我，以音声求我，是人行邪道，不能见如来。大德且道，阿那个是如来？曰：某甲到此却迷去。师曰：从来未悟，说什么却迷。僧曰：请禅师为说。师曰：大德讲经二十余座，却不识如来。其僧再礼拜，愿垂开示。师曰：如来者，是诸法如义，何待忘却？曰：是、是诸法如义。师曰：大德是亦未是。曰：经文分明，那得未是？师曰：大德如否？曰：如。师曰：木石如否？曰：如。师曰：大德如，同木石如否？曰：无二。师曰：大德与木石何别？僧无对，乃叹云：此上人者，难为酬对。良久却问，如何得大涅槃？师曰：不造生死业。对曰：如何是生死业？师曰：求大涅槃，是生死业。舍垢取净，是生死业。有得有证，是生死业。不脱对治门，是生死业。曰：云何得解脱？师曰：本自无缚，不用求解，直用直行，是无等等。僧曰：如禅师和尚者，实为希有，礼谢而去。

（二）三学

问：何者是三学？答：三学者，戒定慧也。问：其义云何？答：清净无染是戒。知心不动，对境寂然，是定。知心不动时，不生不动想；知心清净时，不生清净想；乃至善恶皆能分别，于中无染，得自在者，是名为慧也。

（三）五身

问：方广经云：五种法身，一、实相法身，二、功德法身，三、法性法身，四、应化法身，五、虚空法身。于自己身何者是？答：知心不坏，是实相法身。知心含万象，是功德法身。知心无心，是法性法身。随根应说，是应化法身。知心无形不可得，是虚空法身。若了此义者，即知无证也。无得无证者，即是证佛

法法身，若有证有得，以为证者，即邪见增上慢人也，名为外道。何以故？维摩经云：舍利弗问天女曰：汝何所得？何所证辩？乃得如是。天女答曰：我无得无证，乃得如是，若有得有证，即于佛法中，为增上慢人也。

（四）等觉与妙觉

问：经云等觉妙觉：云何是等觉？云何是妙觉？答：即色即空，名为等觉。二性空故，名为妙觉。又云：无觉无无觉，名为妙觉也。

（五）五眼

问：如来五眼者何？答：见色清净，名为肉眼。见性清净，名为天眼。于诸色境，乃至善恶，悉能微细分之，无所染着，于中自在，名为慧眼。见无所见，名为法眼。无见无无见，名为佛眼。

（六）大乘最上乘

问：大乘最上乘，其义云何？答：大乘者，是菩萨乘。最上乘者，是佛乘。又问：何修而得此乘？答：修菩萨乘者，即是大乘。证菩萨乘，更不起观，至无修处，湛然常寂，不增不减，名最上乘，即是佛乘也。

（七）定慧等用

问：涅槃云：「定多慧少，不离无明，定少慧多，增长邪见，定慧等故，即名解脱。」其义如何？答：对一切善恶，悉能分别，是慧。于所分别之处，不起爱憎，不随所染，是定；即是定慧等用也。

（八）言语道断心行处灭

问：经云：言语道断，心行处灭，其义如何？答：以言显义，得义言绝，义即是空，空即是道，道即是绝言，故云言语道断。心行处灭，谓得义实际，更不起观，不起观故，即是无生：以无生故，即一切色性空，色性空故，即万缘俱绝，万缘俱绝者，即是心行处灭。

（九）如如

问：如如者云何？答：如如是不动义，心真如故，名如如也。是知过去佛，行此行亦得成道；现在佛，行此行亦得成道；未来佛，有此行亦得成道；三世所修证道无异，故名如如也。维摩经云：诸佛亦如也，至于弥勒佛亦如也，乃至一切众生。悉皆如也。何以故？为佛性不断，有性故也。

（十）受佛戒

问：菩萨戒云：众生受佛戒，即入诸佛位，位同大觉已，真是诸佛子。其义云何？答：佛戒者，清净心是也。若有人发心修行清净行，得无所受心者，名受佛戒也。过去诸佛，皆修清净无受行，得成佛道。若今有人，发心修无受清净行者，即与诸佛功德等用无有异也。故云入诸佛位也。

（十一）常不离佛

问：云何是常不离佛？答：心无起灭，对境寂然，一切时中，毕竟空寂，即是常不离佛。

（十二）无为法

问：何者是无为法？答：有为是。问：今问无为法，因何答有为是。答：有

因无立，无因有显，本不立有，无从何生。若论真无为者，即不取有为，亦不取无为，是真无为法也。何以故？经云：若取法相，即着我人，若取非法相，即着我人：是故不应取法，不应取非法，即是取真法也。若了此理，即真解脱，即会不二法门

（十三）无证无无证

问：修道者以何为证？答：毕竟证为证。问：云何是毕竟证？答：无证无无证，是名毕竟证。问：云何是无无证？答：于外不染色声等，于内不起妄念心，得如是者，即名为证。得证之时，不作得证想，即名无证也。得此无证之时，亦不得作无证想，是名无证。即名无无证也。

（十四）即心即佛

有行者问：即心即佛，那个是佛？师云：汝疑那个不是佛，指出看。无对。师曰：达即遍境是，不悟永垂疏。

（十五）消业障

人问：一心修道，过去业障，得消灭否？师曰：不见性人，未得消灭。若见性人，如日照霜雪；又见性人，犹如积草等须弥山，只用一星之火，业障如草，智慧似火。曰：云何知业障尽？师曰：现前心通，前后生事，犹如对见。

（十六）住正法与作佛

有行者问：云何得住正法？师曰：求住正法者是邪，何以故？法无邪正故。曰：云何得作佛去？师曰：不用舍众生心，但莫污染自性。经云：心佛及众生，是三无差别。曰：若如是解者，得解脱否？师曰：本自无缚，不用求解。

（十七）度众生

问：般若经云：度九类众生，皆入无余涅槃。又云：实无众生得灭度者。此两段经文，如何通会前后？人说皆云实度众生，而不取众生相，常疑未决，请师为说。师曰：九类众生，一身具足，随造随成。是故无明为卵生，烦恼包里为胎生，受水浸润为湿生，倏起烦恼为化生，余类类此应知。悟即是佛，迷号众生。菩萨只以念念心为众生，若了念念，心体俱空，名为度众生也。智者于自本际上，度于未形，未形既空，即知实无众生得灭度者。

（十八）见性

问：云何得见性？师曰：见即是性，无性不能见。

（十九）修行

问：如何是修行？师曰：但莫污染自性，即是修行。莫自欺诳，即是修行。大用现前，即是无等等法身。

（二十）法身

问：何者是法身，师曰：心是法身，谓能生万法故，号法界之力。起信论云：所言法者，谓众生心，即依此心，显示摩诃衍义。

（二十一）般若之大小

人问般若大否？师曰：大。曰：几许大？师曰：无边际。曰：般若小否？师曰：小。曰：几许小？师曰：看不见。曰：何处是？师曰：何处不是？